

«ՀՐԱՊԱՐԱԿ» ՕՐԱԹԵՐԹ

Գլխավոր էջ Քաղաքականություն Կենսացներ ու խոստումներ՝ Լոռին «Ժամառժամ»
զարգացնելու մասին

Քաղաքականություն

ԿԵՆԱՑՆԵՐ ՈՒ ԽՈՍՏՈՒՄՆԵՐ՝ ԼՈՌԻՆ «ԺԱՄԱՌԺԱՄ» ԶԱՐԳԱՑՆԵԼՈՒ ՄԱՍԻՆ

31 Հունվար 2026 | 15:150

Facebook Twitter

«Լոռին զարգանում է ժամառժամ». այս հուսադրող միտքը Լոռու մարզպետ Արեն Մկրտչյանինն է: Դուք գիտե՞ք այս մասին: Ես՝ չգիտեի: Մինչ Լոռու մարզպետարանի աշխատակազմի կայքէջում սա կարդալս, որքա՛ն երկար եմ դեգերել անտեղյակության մշուշի մեջ: Բայց ահա՝ աչքերս բացվեցին՝ կարդացի բարի լուրն ու որոշեցի պատմել, որ ձեր աչքերին էլ լույս իջնի:

Պարզվում է՝ Լոռու մարզպետ Արեն Մկրտչյանն այցելել է Շիրակամուտ, որտեղ կառուցվում է կրթահամալիր: Մարզի ղեկավարը հետեւել է շինարարական աշխատանքներին: Մի շինարար անգամ բացել է կարեւոր գաղտնիք՝ այս հիմքերի վրա հնարավոր է 16 հարկանի շենք կառուցել: Գուցե մարզպետը մտքի թռիչքով արդեն տեսել է այդ 16 հարկը, որոնք դարձել են լավատեսության աղբյուր, գուցե մեկ ժամվա շրջայցի ընթացքում կատարված աշխատանքն այնքան ահեղի է թվացել, որ հիմք է տվել աշխարհին ազդարարելու՝ մեր աղքատ մարզը ժամառժամ զարգանում է: Բայց գուցե լավատեսության հիմքում այլ գործե՞ր էլ կան: Փնտրտուքս շարունակեցի մարզպետարանի կայքէջում:

Հաջորդ լուրով հայտնում են, որ Լոռու մարզպետն ուղեկցել է աշխատանքի եւ սոցիալական հարցերի նախարար Արսեն Թորոսյանին՝ Վանաձորի ցերեկային կենտրոնում ծանոթանալու կենտրոնի պայմաններին եւ սննդի որակին: Անհայտ է մնում՝ ի՞նչ տվեց այդ այցը կենտրոնին, ի՞նչ խնդիր լուծվեց, ի՞նչ փուշ հանեցին հանրության մատից, եւ ինչպե՞ս դա ծառայեց մարզի ժամառժամ զարգացմանը: Ավելին իմանալու փորձերն ապարդյուն են՝ նույնիսկ լուրի վերջում նշված «Մանրամասները՝ տեսանյութում» արտահայտությունը պարզապես դատարկ խոսք է. տեսանյութը չկա:

Մյուս լուրը վերաբերում է առողջության համընդհանուր ապահովագրությանը, որը, ըստ պաշտոնական հաղորդագրության, արդեն «մտել է Լոռի»: Առաջին «պտուղները»

ներկայացվում են կոնկրետ թվերով՝ 1,5 մլն, 1 մլն 350 հազար եւ 950 հազար դրամ, որոնք պետք է վճարեին Վանաձորի բժշկական կենտրոնի սրտաբանական բաժանմունքի երեք բուժառու, սակայն ապահովագրության շնորհիվ քաղաքացիները վճարել են 0 դրամ: Մարզպետն այցելել է բժշկական կենտրոն, ծանոթացել բուժառուների վիճակին եւ կարելուրել համընդհանուր ապահովագրությունը՝ որպես հասանելի եւ որակյալ բուժօգնություն ապահովող նախաձեռնություն: Հիանալի է, ուրախալի է: Միայն մի ցանկություն՝ ի շահ հետագա բուժառուների. քանի որ հանրապետությունում ապահովագրության համակարգը ծանր քայլերով է ներդրվում, եւ դժգոհությունները համատարած են, թող Լոռիում ամեն ինչ հարթ ընթանա ու դառնա դրական օրինակ մյուսների համար:

Մոտենում ենք ամենակարելուրին. Լոռու մարզպետն այցելել է Սպիտակ, որտեղ փայտաշեն տնակներում ապրող 36 ընտանիքի համար կառուցվում է բազմաբնակարան շենք: Այդ ընտանիքները Սպիտակի երկրաշարժից հետո արդեն 40 տարի սպասում են սեփական բնակարան ունենալուն: Ծրագիրն իրոք կարելուր սոցիալական նշանակություն ունի երկար տարիներ սպասող ընտանիքների համար, որոնք մեծացել են այս տարիներին, ճյուղավորվել:

Հաջորդ կանգառը բազմաշարչար Ալավերդին է: Գիժ Դեբեդի վարարումների եւ ավերածությունների դառը հիշողությունը պահպանվում է շուրջ երկու տարի: Վերջապես հերթական ընտանիքի բնակարանային խնդիրը լուծվել է՝ 5 մլն 688 հազար դրամ փոխհատուցմամբ: Զրհեղեղից վնասված շենքը դարձել է վթարային եւ ենթակա է քանդման: Փոխհատուցման փաստաթղթերը հանձնել է անձամբ մարզպետ Արեն Մկրտչյանը եւ նշել. «Վարչապետ Նիկոլ Փաշինյանի գլխավորած կառավարության օրոք աղետի էպիկենտրոնում հայտնված ընտանիքները ստիպված չեն անտուն սպասել 40 տարի»: Բնական է՝ ընտրություններ են մոտենում, եւ նման տեքստեր մենք դեռ շատ ենք լսելու: Թափանցիկ ակնարկներ ու հիշեցումներ, քննադատություն նախկին իշխանությունների հասցեին: «Սպիտակում 36 ընտանիք 40 տարի տառապում է, իսկ մենք 2 տարում տուն ենք տալիս» ենթատեքստով: Իհարկե, այդ քննադատության մեջ նաեւ ճշմարտություն կա՝ արդար լինենք: Բայց ճշմարիտ չէ՞ր լինի հիշել նաեւ, որ այդ 40 տարիներից 8-ն արդեն ՔՊ-ի իշխանության տարիներն են: Ինչո՞ւ գործընթացը տեղից չի շարժվում, հնարավոր չէ՞ր արագացնել ջրհեղեղից տուժած ընտանիքներին բնակարանով ապահովելը, եւ որքանո՞վ է այժմ մեկ ընտանիքին բնակարան տալը տեղավորվում «հրատապ օգնության» տրամաբանության մեջ:

Փառավոր լուրեր եւս կան: Սկսվել է ձմեռային գորակոչը, անցկացվում են նորակոչիկներին պարտադիր զինվորական ծառայության ճանապարհելու հանդիսավոր արարողություններ: Դրանց մասնակցում է նաեւ Լոռու մարզպետը: Մի տեղ նա խոստացել է. «Մեկուկես տարի հետո ձեր կենացը կբարձրացվի: Կենացից գատ՝ խոստանում եմ առանց կանգ առնելու աշխատել ձեր ու ձեր ընտանիքների համար՝ մեր երազանքի Հայաստանի կերտման գործը մտքում պահած»:

Եվ, իհարկե, ամենափառավոր լուրը. «Վանաձորցի Մարիամ Ստեփանյանը համալրել է Հայոց բանակի շարքերը: Նա մարտական սամբոյի աշխարհի առաջնության բրոնզե մեդալակիր է, բազմաթիվ միջազգային մրցաշարերի հաղթող: Կժառայի կանանց գումարտակում էլ ծառայության ավարտին կստանա 1 միլիոն դրամ պատվովճար (մանրամասները՝ տեսանյութում)»: Չարչարվել չարժե՝ տեսանյութը չկա: Միանում ենք մարզպետին ու մաղթում ենք. «Բարի վերադարձ, սիրելի զինվորներ: Թող ձեր ծառայությունը լինի օրինակելի ու խաղաղ»:

Գագիկ ԱՆՏՈՆՅԱՆ

Ամբողջական հոդվածը կարող եք կարդալ այս հասցեով՝
<https://hraparak.am/post/abe2ddb0ced20ef3d54aed714c4a1f88>

© 2008 - 2021 «Հրապարակ օրաթերթ»